

Á MESA DO PARLAMENTO

O **Grupo Parlamentario En Marea**, a iniciativa da súa deputada **Paula Vázquez Verao** e a través do seu voceiro **Luís Villares Naveira**, ao abeiro do disposto no artigo 160 do Regulamento da Cámara, presenta a seguinte **Proposición non de lei** para o seu debate na **Comisión 5ª**

EXPOSICIÓN DE MOTIVOS

En decembro de 2018, familiares de persoas residentes na residencia de maiores de Chantada, aberta no 2002, de iniciativa privada, da entidade Geriatros S.A., agora Domus VI, emitiron queixas xerais sobre o seu funcionamento e instalacións.

En primeiro lugar, as críticas alertan da escaseza de persoal do centro e a redución do tempo de atención médica.

Apuntan tamén ao peche da cafetería e á non correspondencia dos menús cos indicados. Sinalan, a este respecto, que é frecuente que as persoas con posibles merquen comida fóra do centro.

As familias indican tamén que hai unha falta de mantemento, estando estragados timbres e interruptores.

A falta de persoal, motiva, segundo familiares de residentes, a menor frecuencia de aseo en persoas dependentes.

Asemade, sinalan a inexistencia de espazo para persoas fumadoras.

Ante todas estas queixas, familiares das persoas residentes critican a actitude da dirección, á que acusan de non aceptar suxestión e de non facilitar información.





Esta escaseza de persoal e queixas pola comida foron tamén queixas de familiares da residencia do Morín, en Monforte, da mesma entidade, Domus VI, que conta con 180 prazas financiadas.

As condicións laborais nas residencias de maiores privadas de Galiza son moi precarias, algo permitido pola Xunta, que mantén un Decreto regulador do persoal das residencias privadas que dispón unhas rateos de persoal nidiamente insuficientes, agravado polo feito de que a inspección ten en conta en global todo o persoal do centro, e non só o de atención directa.

Son competencias da Xunta de Galicia o establecemento do marco normativo en materia de servizos sociais, así como a autorización e acreditación de centros, servizos e programas sociais, así como a súa tipificación e a regulamentación dos requisitos mínimos, tanto xerais coma específicos, que necesariamente deben cumprir, así como a supervisión e avaliación da calidade na prestación dos servizos sociais, para o que se establecerán mecanismos de control obxectivo e continuo deles, así como o exercicio das potestades inspectora e sancionadora. Pero esta labor inspectora está moi mermada, como ten alertado o propio Consello de Contas, que sinala que a Inspección de Servizos Sociais mantivo a mesma estrutura interna e número de efectivos a pesar de aumentaren o número de centros de maiores a inspeccionar. De feito, pese a detectar incidencias nos centros residenciais que non se corruxiron, a Xunta non iniciou expedientes sancionadores.

A Xunta, con competencias plenas en materia de Asistencia Social, é plenamente responsable da situación sociosanitaria das persoas ingresadas nas residencias da terceira idade e é responsable indirecta das precarias condicións laborais do seu persoal.





En Galiza, a porcentaxe de prazas privadas en residencias sobre o total (67%) é a maior de todo o Estado, e dende 2002 non fixo máis que aumentar. A modalidade de xestión máis elixida nos últimos anos foi o concerto, prazas polas que a Xunta paga un 8% máis que se as xestionara de xeito directo.

É unha cuestión de modelo social: dereitos ou negocios.

Polo exposto, o Grupo Parlamentario de En Marea formula a seguinte Proposición non de lei para o seu debate na Comisión 5.^a

O Parlamento de Galicia insta á Xunta de Galicia a:

1. Trasladar á Comisión 5.^a do Parlamento de Galicia un informe sobre a labor inspectora da Xunta a respecto das residencias de Domus VI de Chantada e de Monforte.
2. Impulsar un plan de inspección específico que controle o cumprimento efectivo das rateos de persoal nas residencias privadas do sur de Lugo, garantindo que se substitúen efectivamente as ausencias do persoal.
3. Impulsar un plan de inspección específico que controle as instalacións e características xerais das residencias de maiores do sur de Lugo.
4. Elaborar, no prazo de 6 meses, un estudo específico sobre a situación sociosanitaria nos centros de maiores do sur de Lugo.

Santiago de Compostela, 17 de xaneiro de 2019.

Asdo.: Paula Vázquez Verao

Deputada do G.P. de En Marea





Luís Villares Naveira

Voceiro do G.P. de En Marea.

Asinado dixitalmente por:

Paula Vázquez Verao na data 17/01/2019 18:15:24

Luis Villares Naveira na data 17/01/2019 18:15:29

